

## Italian jadanik lau ministrok aurkeztu dute beren dimisioa

ERROMA

Giuliano Amato Italiako lehen ministroa 'Esku Garbiak' operazioari berriz ere aurre hartu nahian ibili zen, Gianni Fontana Nekazaritza ministroak dimisioa aurkeztu ondoren ustelkeriarekin zerikusirik ez duen ordezkia bilatzeari ekin baitzion, aurrez beste hirutan egin duen bezala.

Fontanak igandean aurkeztu zuen dimisioa. Italia astintzen ari den 'Tangentopoli' eskandaluko kide gehienak bezalaxe, alderdien finantzeketa ilegalean nahastuta egon zela eta aurkako sumarioa ireki ostean azaldu zuen Nekazaritza Ministerioaren ardura uzteko asmoa.

Gianni Fontanari baina, ez zioten sumarioa ministro gisa ireki, Veronako demokristauen ezker korronteko arduradun modura baizik. 'Esku Garbiak' operazioako arduradunek salatu dutenez, zarama erreziklatzeko lantegi baten legez kanpoko adjudikazioan dago nahastua igandera arte Italiako Nekazaritza ministro zena.

Fontana, alderdi politikoaren legez kanpoko finantzaketan aritzeagatik dimitu duen laugarren ministroa da. Claudio Martelli Justizia ministro sozialista izan zen lehena, Francesco de Lorenzo Osasun ministro liberalak dimititu zuen ondoren eta Giovanni Goriak ere utzi egin behar izan zuen Gobernuua.

## Atzerrian daude jada Nikaraguako enbaxada bahitu zuten pertsonak

SAN JOSE

Hamahiru egun luzeren ostean, Nikaraguak Costa Rican duen enbaxada hartu zuten bost *contrak* aske utzi zituzten igandean bahituak izan dituzten lagunak. Ondoren, eta Nikaraguako Gobernuarekin negoziatu bezala, milioi laurden bat dolar jaso eta Costa Ricatik atzerriarako bidea hartu zuten.

Jose Manuel Urbina Lara sandinisten aurkako komandoko buruzagia izan zen enbaxadatik irten zen azken bahitzailea. Managuako Gobernuak jarritako hegazkina hartu zuen Dominikar Errepublikan babes hartzeko.

# Bosniako lehendakariak bake plana onartu zain daude Vance eta Owen

Baietzarekin NBek inposatu egin lezake errepublikan

**Cyrus Vance eta David Owen Jugoslavia ohiko Bake Negoziatzen lehendakariak, Bosnia-Herzegovinako lehendakariak bake plana noiz onartuko zain daude, errepublika horretako serbiarrak isolatu eta plana ezarri ahal izateko, asteburuan Owenek adierazi zuenez.**

NEW YORK

Nazio Batuek New Yorken duten egoitzatik kanpo, Alija Izetbegovic Bosniako lehendakariak Mate Boban Bosniako kroaziarren buruzagiarekin negoziatzen jardun zuen atzo. Izetbegovicek bake plana onar dezan azken artekari bihurtu da Boban, Owenen arabera. Lehendakari musulmanak bake plana onartuz gero, Nazio Batuen Erakundeak inposatu egin lezake Bosniako errepublika osoan, joan zen larunbatean Javier Solana Espainiako Atzerri ministroak azaldu zuen moduan. Baina une honetan, Bosniarako bake negoziaketak bidegurutzean daude, hiru aldeetatik bik, serbiarrak eta musulmanak, ez dutelako errepublika hamar probintzian zatituko lukeen mapa onartzen.

Bi horietako batek bakerako ezinbestekoa den lurralde zatiketa onartu ezean «denbora galtzen ari gara», bake negoziaketarako Europako Komunitateko ordezkariaren arabera. Bake plana onar lezakeen alde bakarra —kroaziarrek hasiera-hasieratik onartu zuten— musulmana da, honek gutxienez negoziatzeko borondatea agertu baitu. Serbia-



Alija Izetbegovic Nazio Batuen egoitzatik irteten.

✓ NBek aste honetan onar lezake indarra erabiltzea, hegaldien debekua betearazteko.

rrek, eta hauen artean beren buruzagi den Radovan Karadzic-ek, mapa negoziatzeari ere uko egiten diote beren baldintzak onartu ezean.

**INDARRAREN ERABILERA BOSNIAN**

Radovan Karadzic lehendakariak haserre handiz erreakzionatu zuen, Nazio Batuetako Segurtasun Kontseilua joan zen urrian Bosnia-Herzegovinan ezarritako hegaldi militarren debekua betearazteko indarraren erabilpena baimen lezakeen ebazpena aztertzen hasia dela jakin ondoren. Indarraren erabilpena aste honetan bertan onar lezake Segurtasun Kontseiluak.

# Gerra kriminalen amnistiak eskandalu politikoa eragin du El Salvadorren

SAN SALVADOR

Eskandalu politiko handi bat eragin du El Salvadorren joan zen larunbatean Legebiltzarrak, presaka eta eskuineko botoekin bakarrik, gerra kriminalentzat amnistia orokorrerako legea onartzeak. Amnistia honek 11 urteko gerran egondako hilketen arduradunak Justiziaren aurrean jaretzea galeraziko du. Lege hau, gerra krimenak aztertu dituen Nazio Batuetako Egiaren Batzordeak eginiko gomendioen aurka dago. Gainera NBeko Segurtasun Kontseiluak ostiralean batzorde horren gomendioak betebeharrak zirela ebatzi zuen. Astebete baino ez da igaro, Alfredo Cristiani lehendakariak amnistia eskatu eta Legebiltzarrak eman

duen arte. «Dena ahaztu eta berriro hasi» ziotenen tesia nagusitu egin da, barkamena jaso aurretik gerra kriminal nagusiak —zeintzuen artean buruzagi militar nagusienak zeuden— beren delituak «garbitzea» exigitzen zuten taldeen gainetik. Azken hauek nazioarteko komunitatearen eta eliza katolikoaren babesa izan dute baina alferrik izan da.

**ISEKA BAKE PROZESUARI**

Rene Ponce jeneralararen moduan —oraindik ez diote onartu Defentsa Ministerioa uzteko aurkeztu zuen dimisioa—, buruzagi militarrek ikusi ahal izan dute, nola astebeteren buruan akusatutak eta barkatuak izan diren, beren uniformeak zintzilikatu beharrik izan gabe.

Prozedura honek oposizioko alderdi guztiak haserretu ditu, Demokrazia Kristauek hasi eta Farabundo Frontera arte (FMLN). Gerra garaian gerrila gisa ibilitako talde honek, hasiera-hasieratik Egiaren Batzordeak eginiko gomendioak onartu zituen, eta FMLNko akusatu guztiek leporatzen zizkieten delituak onartu zituzten. Nazio Batuek, atzerriko enbaxadek eta elizako ordezkariak ere beren haserre azaldu zuten, eta gertatutakoa El Salvadorreko bake prozesuari iseka egitea zela adierazi zuten.

Legebiltzarreko erabakiak, Aliantza Errepublikar Nazionalista (Arena) gobernatzaileak eta Adiskidetz Nazionalen Alderdiak (ultraeskuindarra) emaniko botoekin egin zuen aurrera.

## LABURREAN

### MAYON sumendia lehertzear dago

Filipinetako Luzon uhartean dagoen Mayon sumendiak harriak eta laba jaurtiki zituen bortizki atzo. Laba bere magaletik isuri eta bost kilometroko luzeran hedatu zen. «Erupzio indartsu baten hasiera izan litekeela uste dugu eta ondorengo egunetan leherketa gogorak izango direlakoan gaude», jakinarazi zuten atzo Mayon sumendian lanean ari diren adituek ●

### JAPONIAN egingo da Desarmerako Konferentzia

Apirilaren 13 eta 16 bitartean Japoniak prestatuko du Nazio Batuek babestutako Desarmerako Nazioarteko Konferentzia. 80 gobernutako ordezkariak, Parlamentuetakoak, ikerketa institutuetakoak eta nazioarteko erakunde ez gubernamentalak Kyoton bilduko dira, Japoniako antzinako hiriburuan, eta segurtasun nazionala, Armamentu Nuklearra Ez Ugaltzeko Hitzarmena eta desarmeari dagozkion gaiak jorratuko dituzte besteak beste ●

### TIBETEN 30 pertsona hil ziren manifestazioetan

Tibeten manifestazio independentistak izan ziren hilabetearen hasieran eta gutxienez 30 lagun hil ziren, Tibeteko Asanblea OPopularreko behin-betiko lehendakariak onartu zuenez. Agintariak esan dutenez «Tibetek duen oreka amaitu nahi duten manifestaziak dira» hauek ●

### DORRE bikietako ustezko atentatugilea Egipton

World Trade Centerren aurkako atentatutik ihes egindako ustezko egileetako batek, Mahmud Abouhaimak, behin baino gehiagotan egin du bidaia Afganistanera, Kabuleko agintari komunisten aurka borrokatzerat. 'The New York Times-ek' jakinarazi duenez gainera, atentuen ostean, Egiptora egin zun ihes Dorre Bikietan ustez leherkaria jarri zuen lagun honek ●